

114. Taxaw loo ndi naa fii yal na nu Yàll mey tawféex
Defal nu am ndimmël nangul nu bi jaahi yonnen baa
115. "Sallaa Laahu alaa xayri daahi ileyhi daa-
-iman sarmadan fil aali wa kulli man sàhbaa.

BISMI LAAHI RAHMAANI RAHIMI

13-11-1961

Cangaayal Janaaba

1. "Xaala ibnu" Jibriil di santa Yàlla mi mey Limaamu mey yu réy yu sella
2. Jakleel ka xamxami "luduniyaati" xamalka "maa madaa wa maa sayaatii"
3. Sellal ka jox ka laabukaay yu sella jox ka na ñuy sangoo cangaayal set la
4. Ndax jaamu Yàlla gu àndul ak set ga deefu ko nangu faf kó def muy moy ga
5. Loolo waral ma jók wax ngir Yàlla di laayebiir jullit ñu gëm ña Yàlla
6. Te manu ñoo wérël cangaayal farata xamu ñu it lu ciy sunnaak luy farata
7. May wax di jéema nas la Isaa yaxaloon Ibnu Imaama Laay mi ñépp wóóluwoon
8. Moom la bindoon yónnéé-ko kuy muxadam ci yoonu laayeen ndeke booba dey dem
9. Wuyyujj Buur Yàlla te bëggé yeesal la ñu ka dènkoon ndax ñu man di sellal
10. Ba mu yónnee lile cangaay ci réew yi ak bamu wuyyujee Boroom mbindééf yi
11. Ñenenti weer la ak ñaar fuk ak juróóm ciy fan negul ma wax la ndax nga bafi ca juum
12. Looloo ngi xew gaawu bu yemmook ñatti fan, ci maamu Koor te moom mu jók ñaar fuki fan
13. Yu tek juróóm ñaar ya ci weeru Kori wa ca menna atma muy ca xéytél weer wa
14. Atum junni ak ñatti tééméér ak juróóm benn fukak juróóm ñatta la njool ma dem
15. Te moom juróóm ñaar fuki at ak ñatti at la tollu cik dundam booba ca mooma at
16. Nan dellu jëm si nak li nu jubluwoon moodi cangaay la Seydi Isaa yaxaloon
17. Niki ñu kay sangoo da ngay jëkk raxas sa ñaari téjxa ñatti yoon nga kay raxas
18. Balaa nga leen dugël ca ndap la doora siw ca foofa ngay siwe ngay fas yééné yaw
19. Bul fátte "Bismi Laahi" ca fa ngay raxase, say téjxo doora siw bu leen di jaxase
20. Ginnaaw ba nga siwée ba noppi raxasal fu fi sobe taxoon ci yaw ak fu mu dal
21. Bu jàppandee nga randu tuut taxaw feneen ndéém raxasit ma taa na, looloo gën ci yoon
22. Nga daldi tek raxas sa ñaari loxoya dale ca mbàgaya ba ca baaraam ya
23. Te nga jëkk raxas loxab ndijoor ba boo àggalee daldi ca tek càmmoñ ba
24. Nga daldi cay tek sa wetuk ndijoor, daleel, ca mbaga ma mu jëm ca yeel ba bul tayeel
25. Boo àggalee tek ca wetuk càmmoñ ga nga def ko na nga def wetuk ndijoor ga
26. Nga tek ca dënné ba daleel ca baat ba di ko raxas muy wàcc jëm ca yeel ba
27. Nga tek ginnaaw ga tàmbalee ca doq ga mu jëm ca yeel ba loolu mooy xobeeku ga
28. Nga doora jàpp cër bu nekk benn yoon boo dee raxas sa bopp def ka ñatti yoon
29. Da ngay sèggël sa bopp boo ka dee raxas nga tàmbalee ca doq ga boole kaak raxas
30. Say nopp biir baak ca mbooleem biti ba moomiit nga def ko ñatti yoon ni bopp ba

31. Nga tek ca raxasaat wetuk ndijoor ga nga jànga "faatihā" boleek raxas ga
32. Nga tàm balee raxas ca pàqu bopp ba mu àndandook "faatihā" jēm ca yeel ba
33. Boo àggalee tek ca wetuk càmmoñ ga mu àndak "faatihā" ni gu ndijoor ga
34. Nga tek ca sab dēnnē dale ka ca jé ba mu àndak "faatihā" ba ca jumbux ba
35. Nga tek ginnaaw ga tàm balee ca doŋ ga ak "faatihā" raxas mu yam sa ndigga
36. Ndéém raxasoowoon taŋka ya ca njapp ma nga daldi leen raxas, set nga ca tojma
37. Nga jël sa ñaari loxo taŋxa cam ndox sotti ci sa kaw bopp ba boole kaak wax
38. Ne "Bismi Laahi Rahmaani Rahiimi, al hamdu lilaahi Rabbil aalamiina" daldi
39. cay tek "laa ilaaha illaa Laahu Muhammadu Rasuulu Laahi salla Laahu"
40. "alayhi wasalam" foofa la cangaay la mate, farlul ba di def lile cangaay
41. Deklul ba xam lu cay sunnaak luy farata ndéém yaa ngi jēm ci def càngaayal farata
42. Am na ci way xam yi ku wax ne ku xamul luy sunna yaak farata kooka sanguwul
43. Ndax am tojam setul cangaayam neen la te mbooleem julli yunu ca julli neen la
44. Am na ci ñoom ku wax ne yit ndéém sangu nga, na ñuy sangoo te juumuloo ci set nga
45. Ndéém xam nga ne cangaay li santeb Yàlla bu war ci bépp jaam bu gēm Buur Yàlla
46. Waxal ne faratay cangaay juróom la yééné ja booy dugg ca biir cangaay la
47. Méngélé cër ya, lim ka mooy ñaareel ba ragga ga mbooleem cër ya mooy ñatteel ba
48. Matale cër ya ñew na di ñeenteel ba xàllil kawarga moo matal juróom ba
49. Sunnay cangaay la mooy nga jéké loxo ya raxas ka ba ca taku kaayi jara ya
50. Balaa nga leen dugël ca ndab la ñaati yoon raxas sa biir bēnbēnu nopp ñatti yoon
51. Galaxndikook soraxndiku yii sunnala leneen lu des xamal ni lu ñu sopp la
52. Bu dee ku léttu soxlawul muy firiku ci booy raxas bopp ba waaye war na ko
53. Mu jël ca ndox ma def bu baax ca létt ya bēs ka ba derba tooy ci suufi létt ya
54. "Alhamdu li Laahi" ba la nu jubluwoon matee ci nas la Seydi Isaa yaxaloon
55. Maa ngi gērēm bu baax di sànta Yàlla cim ndimmëlēm ba woy wi mat bu sella
56. Nan sànta Baay Laay mi nu tee rootaa-ni taalam ba leeral na sowook "buldaani"
57. Nuy ñaan ci Yàllam ndimmëlēm ba nu matal lile cangaay ci fépp fu ñu ka waral
58. Ak fuñu ka sunnal "wa salla Laahu alaa Nabiiyinaa wa man waa lahu"

BISMI LAAHI RAHMAANI RAHIIMI

9-10-1963

Marsiya Baay Aliu Silla

1. "Hamdan li Laahi" nu sànta Yàlla ci ay jēfēm
"Inaa li Laahi" la dikle "fiil xur aan"
2. Nu ñaan "salaatu maha salaami" ci Mustafaa
Yàllaa ne roy leen ngën ji giir Adnaan
3. Seetal Yonnenta bi gën mbindééf yi ba tey gisul
Baayam ci àdina loolu doy na kéémaan